

四庫全書

集部

欽定四庫全書

集部  
宋藝圃集卷三

詳校官中書臣陸 湘

侍讀臣孫球覆勘

總校官庶吉士臣何思鈞

校對官編修臣李堯棟

謄錄監生臣李元位

欽定四庫全書

宋藝圃集卷三

明 李萊 編

蘇軾二百四十五首

古離別送蘇伯固

三度別君來此別，真遲暮白盡老鬚鬢。  
明日淮南去，酒罷月隨人淚濕。  
花如霧，後夜逐君還夢遶湖邊路。

雷州

下居近流水水巢依嶺岑終日數椽間但聞鳥遺音爐  
香入幽夢海月明孤斟鷓鴣一枝足所恨非故林

碧落洞

槎牙亂峯合晃蕩絕壁橫遙知紫翠間古來仙釋并陽  
峯射朝日高處連玉京陰谷扣白月夢中游化城果然  
石門開中有銀河傾幽龕入窈窕別戶穿虛明泉流下  
珠琲乳蓋交縵纓我行畏人知恐為仙者迎小語輒響  
答空山自雷驚策杖歸去來治具煩方平

新城陳氏園次晁補之韻

荒涼廢圃秋寂歷幽花晚山城已窮僻况與城相遠我  
來亦何事徒倚望雲巘不見苦吟人清樽為誰滿

開先漱玉亭

高巖下赤日深谷來悲風擘開青山峽飛出兩白龍亂  
沫散霜雪古潭搖清空餘流滑無聲快瀉雙石罅我來  
不忍去月出飛橋東蕩蕩白雲闕沉沉水精宮願隨琴  
高生脚踏赤鱗公手持白芙蓉跳下清冷中

遊鶴林招隱二首

郊原雨初霽春物有餘妍古寺滿脩竹深林聞杜鵑  
餘柳花墮目眩山櫻然西窗有病客危坐看香烟

二

行歌白雲巔坐咏脩竹林風輕花自落日薄山半陰  
澗草誰復識聞香杳難尋時見城市人幽居惜未深

竹亭小飲懷歐陽叔弼季默呈趙景貺陳履常一  
首

歲暮自急景我閒方緩觴  
惟餘西湖晚步轉北渚長地  
坐略少長意行無澗岡  
久知薺麥青稍覺榆葉黃  
益益春欲動湫湫夜未央  
水天鷗鷺靜月霧松桂香  
撫景方婉婉懷人重淒涼  
豈無一老卒坐念兩歐陽  
我意正麋鹿君才亦珪璋  
此會恐難久此懽不可忘

南都妙峯亭

千尋掛雲闕十頃含風灣  
開門弄清泚照見雙銅鑲  
池臺半禾黍桃李餘榛菅  
無人肯回首日暮車班班  
史君非

世人心與古佛閒時邀聲利客來洗塵埃顏新亭在東  
阜飛宇凌通關古甃磨翠壁霜林散煙鬟孤雲抱商丘  
芳草連杏山俯仰盡法界逍遙寄人寰亭亭妙高峯了  
了蓬艾間五老壓彭蠡三峯照潼關均為拳石小配此  
一掬慳煩公為標指免使勤躋攀

金山妙高臺

我欲乘飛車東訪赤松子蓬萊不可到弱水三萬里不  
如金山去清風半帆耳中有妙高臺雲峰自孤起仰觀



初無路誰信平如砥臺中老比丘碧眼照窻几嶢嶢玉  
為骨凜凜霜如齒機鋒不可觸千偈如翻水何須尋德  
雲即此比丘是長生未暇學且學長不死

送曹輔赴閩漕

曹子本儒俠筆勢翻濤瀾往來戎馬間邊風裂儒冠詩  
成橫槩裏楮墨何曾乾一日事遠游紅塵隔岩灘平生  
羊炙口並海搜酸鹹一從荔枝飲豈念首蓓槃我亦江  
海人市朝非所安常恐青霞志坐隨白髮闌淵明賦歸

去談笑便解顏

參寥上人初得知果院會者十六人分韻賦詩某

得心字

漲水返舊壑飛雲思故岑念君忘家客亦有懷歸心三  
間得幽寂數步藏清深攢金盧橘塢散花楊梅林茶笋  
盡禪味松杉真法音雲崖有淺井玉醴常半尋遂名參  
寥泉可濯幽人襟相攜橫嶺上未覺衰年侵一眼吞江  
湖萬象涵古今願君更小築歲晚解我簪

夜坐與邁聯句

清風來無邊明月翳復吐自松聲滿虛空竹影侵半戶

邁暗枝有驚鵲壞壁鳴饑鼠自露葉耿高梧風螢落空

無邁微涼感團扇古意歌白紵自樂哉今夕游復此陪

杖履邁傳家詩律細已自過宗武短詩滕上成聊以慰

懷祖自

和子由記園中草木四首

行樂惜芳辰秋風常苦早誰知念離別喜見秋瓜老秋

瓜感霜霰莖葉颯已槁官游歸無時身若馬繫阜悲鳴  
念千里耿耿志空抱多憂竟何為使汝玄髮縞

二

自我來闕輔南山得再遊山中亦何有草木媚深幽  
菖蒲人不識生此亂石溝山高霜雪苦苗葉不得抽下有  
千歲根蹙縮如蝓虬長為鬼神守德薄安敢偷

三

我歸自南山山翠猶在目心隨白雲去夢繞山之攬汝

從何方來笑齒粲如玉探懷出新詩秀語奪山綠覺來  
已茫昧但記說秋菊有如採樵子入洞聽琴筑歸來寫  
遺聲猶勝人間曲

四

野菊生秋澗芳心空自知無人驚歲晚唯有暗蛩悲花  
開澗水上花落澗水湄菊衰蛩亦蟄與汝歲相期楚客  
方多感秋風詠江蘼落英不滿掬何以慰朝飢

次韻孫莘老斗野亭寄子由在邵伯堰

落帆謝公渚日脚東西平孤亭得小憇暮景含餘清坐  
待斗與牛錯落掛南甍老僧如宿昔一笑意已傾新詩  
出故人舊事疑前生吾生七往來送老海上城逢人輒自  
哂得魚不忍烹似聞續溪老復作東都行小詩如秋菊  
艷艷霜中明過此感我言長篇發春榮

黃州

南山一尺雪雪盡山蒼然澗谷深自暖梅花應已繁使  
君厭騎從車馬留山前行歌招野叟共步青林間長松

得高蔭盤石堪醉眠  
祇樂聽山鳥攜琴寫幽泉  
愛之欲忘返但苦世俗牽  
歸來始覺遠明月高峰顛

秋懷

海風東南來吹盡三日雨  
空堦有餘滴似與幽人語  
念我平生觀寂寞守環堵  
壺漿慰作勞裹飯救寒苦  
今年秋應熟過此飽雞黍  
嗟我獨何求萬里涉江浦  
居貧豈無食自不安歔歔  
念此坐達晨殘燈翳復吐

送鄭戶曹

水遶彭城樓山圍戲馬臺古來豪傑地千歲有餘哀  
隴淮飛上天重瞳亦成灰白門下呂布大星隕臨淮尚想  
劉德輿置酒此徘徊爾來苦寂寞廢圃多蒼苔河從百  
步響山到九里回山水自相激夜聲轉風雷蕩蕩清河  
孺黃樓我所開秋月墮城角春風搖酒杯遲君為坐客  
新詩出瓊瑰樓成君已去人事固多乖他年君倦游白  
首賦歸來登樓一長嘯使君安在哉

送李公擇



嗟余寡兄弟四海一子由故人雖云多出處不我謀弓  
車無停招逝去勢莫留僅存今幾人各在天一隅有如  
長庚月到晚爛不收宜我與夫子相好手足侔比年兩  
見之賓主更獻酬樂哉十日飲衍衍和不流論事到深  
夜僵仆鈴與騶頗嘗見使君有客如此不欲別不忍言  
慘慘集百憂念我野夫兄知名三十秋已得其為人不  
待風馬牛他年林下見傾蓋如白頭

送俞節推

吳興有君子淡如朱絲琴一唱三太息至今有遺音嗟  
余與夫子相避如辰參猶喜見諸郎窈然清且深異時  
多良士末路喪初心我生不有命其肯枉尺尋

冬至日贈安節

我生幾冬至少小如昨日當時事父兄上壽拜脫膝十  
年閱凋謝白髮催衰疾瞻前惟兄三顧後子由一近者  
隔濤江遠者天一壁今朝復何幸見此萬里姪憶汝總  
角時啼笑為梨栗今來能慷慨志氣堅鐵石諸孫行復

爾世事何時畢詩成却超然老淚不成滴

過建昌李野夫公擇故居

彭蠡東北源廬阜西南巖何人脩水上種此一雙玉思  
之不可見破澤餘修竹四鄰戒莫犯十畝森似束我來  
仲夏初解籜呈新綠幽鳥向我鳴野人留我宿徘徊不  
忍去微月掛喬木遙想他年歸解組巾一幅對牀老兄  
弟夜雨鳴竹屋臥聽鄰寺鐘書窻耿殘燭

張旣辰永康所居萬卷堂

君家四壁如相如卷藏天祿吞石渠豈惟鄴侯三萬軸  
家有世南行秘書兒童拍手笑何事笑人空腹談經義  
未許中郎得異書且共揚雄說竒字清江縈山碧玉環  
下有老龍千古閒知君好事家有酒化為老人夜扣關  
留侯之孫書滿腹玉函寶方何用讀濠梁空復五車多  
圯上從來一篇足

薄命佳人

錢塘試尼童經

雙頰凝酥髮抹漆眼光入簾珠的樂故將白練作仙衣

不許紅膏汙天質吳音嬌軟帶兒癡無限閒愁總未知  
自古佳人多命薄閉門長信楊花落

東陽水樂亭

為東陽令王  
都官築作

君不學白公引涇東注渭五斗黃泥一鍾水又不學哥  
舒橫行西海頭歸來羯鼓打涼州但向空山石壁下愛  
此有聲無用之清流流泉無絃石無竅強名水樂人人  
笑慣見山僧已厭聽多情海月空留照洞庭不復來軒  
轅至今魚龍舞鈞天聞道磬囊東入海遺聲恐在海山

間鏘然澗谷含宮徵節奏未成君獨喜不須寫入薰風  
絃縱有此聲無此耳

豆粥

君不見滹沱流澌車折軸公孫倉皇奉豆粥濕薪破竈  
自燎衣饑寒頓解劉文叔又不見金谷敲冰草木春帳  
下烹煎皆美人萍虀豆粥不傳法吐嗟而辦石季倫干  
戈未解身如寄聲色相纏心已醉身心顛倒自不知更  
識人間有真味豈如江頭千頃雪色蘆茆簷出沒晨煙

孤地確舂杭光似玉沙瓶煮豆軟如酥我老此身無著  
處賣書來問東家住臥聽雞鳴粥熟時蓬頭曳履君家

去

次韻子由書李伯時所藏韓幹馬

潭潭古屋雲幕垂省中文書如亂絲忽見伯時畫天馬  
朔風邊沙生落錐天馬西來從西極勢與落日爭先一作

分馳龍膺豹股頭八尺奮迅不受人間羈元狩虎春聊

可友開元玉花何足竒伯時有道真吏隱飲啄不羨山

梁雌丹青弄筆聊爾耳意在萬里誰知之  
幹惟盡肉不盡骨而况失實空餘皮煩君巧說腹中事妙語欲遣黃泉知君不見韓生自言無所學廐馬萬匹皆吾師

雪齋

為杭僧法言作

君不見峨眉山西雪千里北望成都如井底春風百日吹不消五月行人如凍蟻紛紛市人爭奪中誰信言公似贊公人間熱惱無處避一作洗故向西齋作雪峯我夢扁舟適吳越長廊靜院燈如月開門不見人與牛惟見



空庭滿山雪

言有詩見寄云林  
下閒看水牯牛

四時詞

四首

春雲陰陰雪欲落東風和冷驚羅幕  
漸看遠水綠生漪  
未放小桃紅入萼佳人瘦盡雪膚肌  
眉斂春愁知為誰  
深院無人剪刀響應將白紵作春衣

垂柳陰陰日初永蔗漿酪粉金盤冷  
簾額低垂紫燕忙  
蜜脾已滿黃蜂靜高樓睡起翠眉顰  
枕破斜紅未肯勻  
玉腕半掀雲碧袖樓前知有斷腸人

新愁舊恨眉生綠粉汗餘香在蘄竹象牀素手熨寒衣  
爍爍風燈動華屋夜香燒罷掩重扃香霧空濛月滿庭  
抱琴轉軸無人見門外空聞裂帛聲

霜葉蕭蕭鳴屋角黃昏斗覺羅衾

一作裳

薄夜風搖動鎮

幃屏酒醒夢回聞雪落起來呵手畫雙鴉醉臉輕勻襯  
彩霞真態生香誰畫得玉奴纖手嗅梅花

芙蓉城

并引

世傳太原王迥字子高嘗與仙人汝南周瑤英

同遊元豐元年三月余識子高問之信然乃作  
此詩極其情而歸之正亦變風止乎禮義之意  
也

芙蓉城中花冥冥誰其主者石與丁珠簾玉案翡翠屏  
風舒霞捲千娉婷中有一人長眉青烟如微雲淡疎星  
往來三世空煉形竟坐誤讀黃庭經天門夜開飛爽靈  
無復白日乘雲駢俗緣千仞磨不盡翠被冷落淒餘馨  
因過緱山朝帝廷夜聞笙簫弭節聽飄然而來誰使令

皎如明月入窗櫺忽然而去不可執寒衾虛幌風泠泠  
仙宮洞房本不扁夢中同躡鳳凰翎徑度萬里如奔霆  
玉樓浮空聳亭亭天書雲篆誰所銘繞樓飛步高玲峴  
仙風鏘然韻流鈴遽遽形開如酒醒芳卿寄謝空丁寧  
一朝覆水不返餅羅巾別淚空熒熒春風花間秋葉零  
世間羅綺紛臙腥此生流浪隨滄溟偶然相別兩浮萍  
願君收視觀三庭勿與嘉穀生蝗螟從渠一念三千齡  
下作人間尹與邢

襄陽樂府 三篇

野鷹來

野鷹來萬山下荒山無食鷹苦飢飛來為爾繫綠絲北  
原有兔老且白年年養子秋食菽我欲擊之不可得年  
深兔老鷹力弱野鷹來城東有臺高崔嵬臺中公子着  
皮袖東望萬里心悠哉鷹何在嗟爾公子歸無勞使鷹  
可呼亦凡曹天陰月黑狐夜嘯

上堵吟

臺上有客吟秋風悲聲蕭散飄入宮臺邊遊女來竊聽  
欲學聲同意不同君悲竟何事千里金城兩稚子白馬  
為塞鳳為闕山川無人空且閒我悲亦何苦江水東更  
深鱖魚冷難捕悠悠江上聽歌人不知我意徒悲辛

襄陽樂

使君未來襄陽愁提戈入市裏氍毹自從氍毹南渡汙  
襄陽無事多春遊襄陽春遊樂何許峴山之陽漢江浦  
使君朱旆來翻翻人道使君似羊杜道邊逢人問洛陽

中原苦戰春田荒北人聞道襄陽樂目送飛鴻應斷腸

歐陽少師令賦所蓄石屏

何人遺公石屏風上有水墨希微蹤不畫長林與巨石

一作直

獨畫我眉山西雪嶺上萬歲不長之孤松崖崩澗

絕可望不可到孤煙落日相溟濛含風偃蹇得真態刻  
畫始信天有功我恐畢宏韋偃死莽號山下骨可朽爛  
心難窮神機巧思無可發化為煙霏淪石中古來畫師  
非俗士摹寫物象略與詩人同願公作詩慰不遇無使

二子含憤泣幽宮

遊靈隱寺得李杞寺丞見和詩復用前韻

君不見錢塘湖錢王壯觀今已無  
屋堆黃金斗量珠運  
盡不勞折簡呼四方  
宦遊散其孥宮闕留與閑人娛  
盛衰哀樂兩湏臾  
何用多憂心鬱紆  
溪山處處皆可廬  
最愛靈隱飛來孤  
喬松百丈蒼髯鬚  
擾擾下笑柳與蒲  
高堂會食羅千夫  
撞鐘擊鼓喧朝晡  
疑香方丈眠氍毹  
絕勝絮被縫海圖  
清風時來驚睡餘  
遂超羲皇傲凡遽  
歸



時棲鴉正畢逋孤煙落日不可摹

仙都山鹿

老泉詩序云至豐都縣將遊仙都觀見知縣李長官云固知君之將至也此山有鹿甚老而猛獸獵人終莫能害將有客來遊鹿輒夜鳴故常以此候之而未嘗失余聞而異之乃為作詩

日月何促促塵世苦局束仙子去無蹤故山遺白鹿仙人已去鹿無家孤棲悵望層城霞至今聞有遊洞客夜

來江市叫平沙長松千樹風蕭瑟仙宮去人無咫尺夜  
鳴白鹿安在哉滿山秋草無形迹

李思訓畫長江絕島圖

山蒼蒼江茫茫大孤小孤江中央崖崩路絕猿鳥去惟  
有喬木攬天長客舟何處來棹歌中流聲一作抑揚沙

平風軟望不到孤山久與船低昂峨峨兩煙鬢曉鏡開  
新粧舟中賈客莫漫狂小孤前年嫁彭郎

送劉放倅海陵

君不見阮嗣宗臧否不挂口莫誇舌在牙齒牢是中惟  
可飲醇酒讀書不用多作詩不須工海邊無事日日醉  
夢魂不到蓬萊宮秋風昨夜入庭樹蓴絲未老君先去  
君先去幾時回劉郎應白髮桃花開不開

送將官梁左藏赴莫州

燕南垂趙北際其間不合大如礪至今父老哀公孫蒸  
土為城鐵作門城中積穀三百萬猛士如雲驕不戰一  
朝鼓角鳴地中帳下美人空掩面豈如千騎平時來笑

談警效生風雷葛巾羽扇紅塵靜投壺雅歌清燕開東  
方健兒虢虎樣泣涕懷思廉恥將彭城老守亦凄然不  
見君家雪兒唱

甘露寺彈箏

多景樓上彈神曲欲斷哀絃再三促江妃出聽霧雨愁  
白浪翻空動浮玉金山名喚取吾家雙鳳槽遣作三峽孤  
猿號與君合奏芳春調啄木飛來雙樹杪

答呂梁仲屯田

亂山回合

一作合音

圍彭門官居獨在懸水村

呂梁地名

居民蕭

條雜麋鹿小市冷落無鷄豚  
黃河西來初不覺但訝清  
泗流奔渾夜聞沙岸鳴  
甕盎曉看雪浪浮鵬鷗  
呂梁自古喉吻地萬頃一  
抹何由吞坐觀入市卷  
閭井吏民走盡餘王尊  
計窮路斷欲安適吟詩  
破屋愁鳶蹲歲寒霜  
重水歸壑但見屋瓦留  
沙痕入城相對如夢寐  
我亦僅免為魚龜旋呼  
歌舞雜談笑不惜飲  
酬空餅盆念君官  
舍冰雪冷新詩美酒聊  
相溫人生如寄何不  
樂任使絳

臘燒黃昏宣房未築淮泗滿故道堙滅瘡痍存明年勞  
苦應更甚我當舂鍤先黥髡付君萬指伐頑石千鎚雷  
動蒼山根高城如鐵洪口決談笑却掃看崩奔農夫掉  
臂免狼顧秋穀布野如雲屯還須更置軟脚酒為君擊  
鼓行金樽

送戴蒙赴成都玉局觀將老馬

拾遺被酒行歌處野梅官柳西郊路聞道華陽版籍中  
至今尚有城南杜我欲歸尋萬里橋水花風葉暮蕭蕭

芋魁徑尺誰能盡，椹木三年已足燒。  
百歲風燈一作狂定何有，羨君今作峩眉叟。  
縱未家生執戟郎，也應世出埋輪守。  
莫欺老病未歸身，玉局他年第幾人。  
會待子猷清興發，還須雪夜去尋君。

送陳睦知潭州

華清縹緲浮高棟，上有纈林藏石甕。  
一杯此地初識君，千巖夜上同飛鞚。  
君時年少面如玉，一飲百觚嫌未痛。  
白鹿泉頭山月出，寒光潑眼如流汞。  
朝元閣上酒醒時，

臥聽風鑿鳴鐵鳳舊遊空在人何處二十三年真一夢  
我得生還雪髯滿君亦老嫌金帶重有如社燕與秋鴻  
相逢未穩還相送洞庭青草渺無際天柱紫蓋森欲動  
湖南萬古一長嗟付與騷人發朝弄

送表弟程六知楚州

烟烟明珠照雙璧當年三老蘇程石里人下道避鳩杖  
刺史迎門倒鳧舄我時與子皆兒童狂走從人覓梨栗  
徒如黃犢不可恃隙過白駒那暇惜醴泉寺古垂橘柚



石頭山高閣松櫟諸孫相逢萬里外一笑未解千憂積  
子方得郡守山陽老手生風謝刀筆我正含毫紫微閣  
病眼昏花困書檄莫教印綬繫餘年去掃墳墓當有日  
功成白頭早歸來共藉梨花作寒食

趙令晏崔白大圖幅徑三丈

扶桑大繭如甕盎天女織綃雲漢上往來不遣鳳銜梭  
誰能鼓臂投三丈人間刀尺不敢裁丹青付與濠梁崔  
風蒲半折寒鴈起竹間灼爍橫江梅畫堂粉壁翻雲幕

十里江天無處著好臥元龍百尺樓笑看江水拍天流

郭熙畫秋山平遠

潞公為  
跋尾

玉堂畫掩春日閒中有郭熙畫春山鳴鳩乳鷺初睡起

白波青嶂非人間離離短幅開平遠漠漠疎林寄秋晚

恰似江南送客時中流回頭望雲巘伊川佚老鬢如霜

臥看秋山思洛陽為君紙尾作行草炯如嵩洛浮秋光

我從公游如一日不覺青山映黃髮為畫龍門八節灘

待向伊川買泉石

九月十五日迺英講論語終篇賜執政講讀史官  
燕于東宮又遣中使就賜御書詩各一首臣軾得  
紫薇花絕句其詞云絲綸閣下文章靜鐘鼓樓中  
刻漏長獨坐黃昏誰是伴紫薇花對紫薇郎翌日  
各以表謝又進詩一篇臣軾詩云

繡裳畫袞雲垂地不作成王剪桐戲日高黃繖下西清  
風動槐龍舞交翠壁中蠹簡今千年漆書科斗光射天  
諸儒不復憂叻燥東宮賜酒如流泉酒酣復拜千金賜

一紙驚鷹回鳳字蒼顏白髮便生光袖有驪珠三十四  
歸來車馬已喧闐爭看銀鈎墨色鮮人間一日轉萬口  
喜見雲章第一篇玉堂書掩文書靜鈴索不搖鐘漏永  
莫言弄筆數行書須信時平由主聖犬羊散盡沙漠空  
捷烽夜到甘泉宮似聞指揮築上郡已覺談笑無西戎  
文思天子師文母終閉玉闕辭馬武小臣願對紫薇花  
試草尺書招贊普

和王晉卿送梅花

東坡先生未歸時自種來禽與青李五年不踏江頭路  
夢逐東風泛蘋芷江梅山杏為誰容獨笑依依臨野水  
此間風物君未識花浪翻天雪相激明年我復在江湖  
知君對花三嘆息

和蔡景繁海州石室

芙蓉仙人

石曼卿也

舊遊處蒼藤翠壁初無路戲將桃核裹

黃泥石間散擲如風雨坐令空山出錦繡依天照海花  
無數花間石室可容車流蘇寶蓋窺靈宇何年霹靂起

神物玉棺飛出王喬墓當時醉臥動千日至今石縫餘  
糟醕仙人一去五十年花老室空誰作主手植數松今  
偃蓋蒼髯白甲低瓊戶我來取酒酌先生後車仍載胡  
琴女一聲冰鐵散巖谷海為瀾翻松為舞爾來心賞復  
可人持節中郎醉無伍獨臨斷岸撫出日紅波碧燄相  
吞吐徑尋我語覓餘聲拄杖彭鏗扣銅鼓長篇小字遠  
相寄一唱三嘆神淒楚江風海雨入牙頰似聽石室胡  
琴語我今老病不出門海山巖洞知何許門外桃花自

開落牀頭酒甕生塵土前年開閣放柳枝今年洗心參  
佛祖夢中舊事時一笑坐覺俯仰成今古願君不用刻  
此詩東海桑田真旦暮

和秦太虛梅花

西湖處士骨應槁只有此詩君壓倒東坡先生心已灰  
為愛君詩被花惱多情立馬待黃昏殘雪消遲月出早  
江頭千樹春欲闌竹外一枝斜更好孤山山下醉眠處  
點綴裙腰紛不掃萬里春隨逐客來十年花送佳人老

去年花開我已病今年對花還草草不如風雨卷春歸  
收拾餘香還太昊

自興國往筠宿石田驛南二十五里野人舍

溪上青山三百疊快馬輕衫來一抹倚山脩竹有人家  
橫道青泉知我渴芒鞋竹杖自輕軟蒲薦松牀亦香滑  
夜深風露滿中庭惟見孤螢自開闔

鐵溝行贈喬太博

城東坡壠何所似風吹海濤低復起城中病守無所為



走馬來尋鐵溝水鐵溝水淺不容輒恰似當年韓與侯  
有魚無魚何足道駕言聊復寫我憂荒一作孤村野店亦  
何有欲發狂言湏斗酒山頭落日側金盃倒著接羅搔  
白首忽憶從軍年少時輕裘細馬百不知臂弓腰箭南  
山下追逐長楊射獵兒老去同君兩憔悴犯夜醉歸人  
不避今年定起故將軍未肯先誅灞陵尉

和子由與顏長道同遊百步洪相地築亭種柳

平明坐衙不暖席歸來閉閣閒終日臥聞客至倒屣迎

兩眼朦朧餘睡色城東泗水步可到路轉河洪翻雪白  
安得青絲絡駿馬蹙踏飛波柳陰下奮身三丈兩蹄間  
振鬣長鳴身自乾少年狂興久已謝但憶嘉陵遠劍關  
劔關大道車方軌君自不去歸何難山中故人應大笑  
築室種柳何時還

贈寫御容妙善師

憶昔射策幸先皇珠簾翠幄分兩箱紫衣中使下傳詔  
跪捧冉冉聞天香仰觀眩晃目生暈但見曉色開扶桑

迎陽晚出來就坐絳紗玉斧光照廊野人不識日月角  
鬢髯尚記重瞳光三年歸來真一夢橋山松檜淒風霜  
天容玉色誰敢畫老師古寺晝閉房夢中神授心有得  
覺來信手筆已忘幅巾常服儼不動孤臣入門涕自滂  
元老侑坐鬚眉古虎臣立侍冠劍長平生慣寫龍鳳質  
肯顧草間猿與麀都人踏破鐵門限黃金白璧空堆牀  
爾來摹寫亦到我謂是先帝白髮郎不須覽鏡坐自了  
明年乞身歸故鄉

蔡景繁官舍小閣

使君不獨東南美典型長記先君子戲嘲王叟短轅車  
肯為徐郎書紙尾三年弭節江湖上千首放懷風月裏  
手開東閣坐虛明目淨東溪照清泚素琴蜀酒容一榻  
落霞共鷺供千里大舫何時繫門柳小詩屢欲書窻紙  
文昌新構滿鸚鵡都邑正喧收祀梓相逢一醉豈有命  
南來寂寞君歸矣

寄吳德仁兼簡陳季常

東坡先生無一錢十年家火燒凡鉛黃金可成河可塞  
只有霜鬢無由玄龍丘居士亦可憐談空說有夜不眠  
忽聞河東獅子吼拄杖落手心茫然誰似濮陽公子賢  
飲酒食肉自得仙平生寓物不留物在家學得忘家禪  
門前穉穉十頃田清溪繞屋花連天溪堂醉卧呼不醒  
落花如雪春風顛我遊蘭溪訪清泉已辦布鞵行青纏  
嵇山不是無賀老我自興盡回酒船恨君不識顏平原  
恨我不識元魯山銅駝陌上會相見握手一笑三千年

蒜山松林中可卜居予欲就其地地屬金山故作  
詩與金山元長老

魏王大瓠無人識種成何翅實五石不辭破作兩大尊  
只憂水淺江湖窄我材濩落無所用虛名驚世終何益  
東方先生好自譽伯夷子路并為一杜陵布衣老且愚  
信口自比契與稷暮年欲學柳下惠嗜好酸醎不相入  
金山也是不羈人早歲聞名晚相得我醉而嬉欲先去  
旁人笑倒山謂實問我此生何所歸笑指浮休百年宅

蒜山幸有閒田地招此無家一房客

寄蘄簞與蒲傳正

蘭溪美箭不成笛離離玉筋排霜脊千溝萬縷自生風  
入手未開先慘慄公家列屋閒蛾眉珠簾不動花陰移  
霧帳銀床初破睡牙籤玉軸坐彈棋東坡病叟長羈旅  
凍卧飢吟似饑鼠倚賴春風洗破衾一夜雪寒披故絮  
火冷燈清誰復知孤舟兒女自嚙呷皇天何時反炎燠  
愧此八尺黃琉璃願公淨掃清香閣臥聽風猗聲滿榻

習習還從兩腋生請公稱此朝闈闔

滄洲亭懷古

湘水悠悠天際來夾江古木抱山回城中人物若可數  
日晏市散多蒼苔九疑巉天古雲埋遙想帝子龍車迴  
心衰目極何可望九歌寂寂令人哀

栢家渡

栢家渡西日欲落青山上下猿鳥樂欲因新月望吳雲  
遙看北斗掛南嶽一夢惛惛四十秋古人不死終未休



草舍蕭條誰與語香風欲過白蘋洲

清遠舟中寄耘老

小寒初渡梅花嶺萬壑千岩背人境清遠聊為泛舟行  
一夢分明墮鄉井覺來滿眼是湖山鴨綠波搖鳳凰影  
海陵居士無雲梯歲晚結廬潁水湄山腰自懸蒼玉佩  
野馬不受黃金羈門前車蓋獵獵走笑倚清流數鬢絲  
汀洲相見春風起白蘋吹花散煙水萬里飄蓬未得歸  
目斷滄浪淚如洗北鴈南來遺素書苦言大浸沒我廬

清齋十日不燃鼎，曲突往往巢龜魚。今年玉粒賤如水，  
清銅欲買囊已虛。人生百年如寄耳，七十朱顏能有幾。  
有子休論賢與愚，倪生枉却帶經鋤。天南看取東坡叟，  
可是平生廢讀書。

大雪獨留尉氏

古驛無人雪滿庭，有客冒雪來自北。紛紛笠上已盈寸，  
下馬登堂面蒼墨。苦寒有酒不能飲，見之何必問相識。  
我酌徐徐不滿觥，看客倒盡不留滴。千門晝閉行路絕。

相與笑語不知夕醉中不復問姓名馬上忽去橫短策  
二十七日自陽平至斜谷宿於南山中蟠龍寺

橫槎晚渡碧澗口騎馬夜入南山谷

音浴

谷中暗水響瀧

瀧嶺上疎星明煜煜寺藏岩底千萬仞路轉山腰三百曲  
風生飢虎嘯空林月黑驚麝竄修竹入門突兀見深  
殿照佛青瑩有殘燭媿無酒食待遊人旋斫杉松煮溪  
藪板閣獨眠驚旅枕木魚曉動隨僧粥起觀萬瓦鬱參  
差目亂千嵒散紅綠門前商賈負椒薜山後咫尺連巴

金史卷之三  
卷三  
蜀何時歸耕江上田一夜心逐南飛鵠

王願赴建州錢監求詩及草書

我昔識子自武功寒廳夜語樽酒同酒闌燭盡語不盡  
倦僕立寐僵屏風丁寧勸學不死訣自言親受方瞳翁  
嗟予聞道不早悟醉夢顛倒隨盲聾爾來憂患苦摧剥  
意思蕭索如霜蓬羨君顏色愈少壯外慕漸少由中充  
河車挽水灌腦黑丹砂伏火入頰紅大梁相逢又東去  
但道何日辭樊籠未能便乞岫嶠令官曹似是錫與銅

留詩河上慰離別草書未暇緣怱怱

送呂希道知和州

去年送君守解梁今年送君守歷陽年年送人作太守  
坐受塵土堆胷腸君家聯翩三將相富貴未已今方將  
鳳雛驥子生有種毛骨徃徃傳諸郎觀君崛鬱負竒表  
便合劔佩趨明光胡為小郡屢奔走征馬未解風帆張  
我生本自便江海忍耻未去猶徬徨無言贈君有長嘆  
美哉河水空洋洋

送劉道原歸覲南康

晏嬰不滿六尺長高節萬仞凌首陽青衫白髮不自嘆  
富貴在天那得忙十年閉戶樂幽獨百金購書收散亡  
竭來東觀弄丹墨聊借舊史誅姦強孔融不肯下曹操  
汲黯本自輕張湯雖無尺董與寸及口吻排擊含風霜  
自言靜中閱世俗有似不飲觀酒狂衣巾狼籍又屢舞  
旁人大笑供千場交朋翩翩去略盡惟我與子猶徬徨  
世人共棄君獨厚豈敢自愛恐子傷朝來告別驚何速

歸意已逐征鴻翔匡廬先生古君子掛冠兩紀鬢未蒼  
定將文度置膝上喜動鄰里烹猪羊君歸為我道姓字  
幅巾他日容登堂

遊金山寺

我家江水初發源宦遊直送江入海聞道潮頭一丈高  
天寒尚有沙痕在中冷南畔石盤陀古來出沒隨濤波  
試登絕頂望鄉國江南江北青山多羈愁畏晚尋歸楫  
山僧苦留看落日微風萬頃龍文細斷霞半空魚尾赤

是時江月初生魄二更月落天深黑江心似有炬火明  
飛焰照山樓鳥驚悵然歸臥心莫識非鬼非人竟何物  
江山如此不歸山江神見怪驚我頑我謝江神豈得已

有田不歸如江水

是夜所  
見如此

臘日遊孤山訪惠勤惠思二僧

天欲雪雲滿湖樓臺明滅山有無水清石出魚可數林  
深無人鳥相呼臘日不歸對妻孥名尋道人實自娛道  
人之居在何許寶雲山前路盤紆孤山孤絕誰肯廬道



人有道山不孤紙窻竹屋深自暖擁褐坐睡依圓蒲天  
寒路遠愁僕夫整駕催歸日未晡出山迴望雲木合但  
見野鶻盤浮圖茲遊淡泊歡有餘到家恍如夢蘧蘧作  
詩火急追亡逋清景一失後難摹

李杞寺丞見和前篇復用元韻答之

獸在藪魚在湖一入池檻歸期無誤隨弓旌落塵土坐  
使鞭箠環呻呼追胥連保罪及孥

近屢獲鹽賊皆  
坐同保徒其家

百日

愁歎一日娛白雲舊有終老約朱紱豈合山人紆人生

何者非遽廬故山鶴怨秋猿孤何時自駕鹿車去掃除  
白髮煩芎蒲麻鞋短箭隨獵夫射弋狐兔供朝晡陶潛  
自作五柳傳潘閔畫入三峯圖吾年凜凜今幾餘知非  
不去慙衛遽歲荒無術歸亡逋鵠則易畫虎難摹

送別

鴨頭春水濃如染水面桃花弄春臉衰翁送客水邊行  
沙襯馬蹄烏帽點昂頭問客幾時歸客道秋風落葉飛  
繫馬綠楊開口笑傍山依約見斜暉

和蔡準郎中見邀遊西湖

夏潦漲湖深更幽西風落木芙蓉秋飛雪閣天雲拂地  
新蒲出水柳映洲湖上四時看不足惟有人生飄若浮  
解顏一笑豈易得主人有酒君應留君不見錢塘遊宦  
客朝推囚幕決獄不因人喚何時休

遊道場山何山

道場山頂何山麓上徹雲峰下幽谷我從山水窟中來  
尚愛此山看不足陂湖行盡白漫漫青山忽作龍蛇盤

山高無風松自響誤認石齒號驚湍山僧不放山泉出  
屋底清池照瑤席堦前合抱香入雲月裏仙人親手植  
出山回望翠雲鬟碧瓦朱欄縹渺間白水田頭問行路  
小溪深處是何山高入讀書夜達旦至今山鶴鳴夜半  
我今廢學不歸山山中對酒空三嘆

自普照遊二庵

長松吟風晚雨細東菴半掩西菴閉山行盡日不逢人  
浥浥野梅香入袂居僧笑我戀清景自厭山深出無計

我雖愛山亦自笑，獨往神傷後難繼。不如西湖飲美酒，  
紅杏碧桃香覆髻。作詩寄謝採薇翁，本不避人那避世。

定惠院寓居月夜偶出

幽人無事不出門，偶逐東風轉良夜。參差玉宇飛木末，  
繚繞香煙來月下。江雲有態清自媚，竹露無聲浩如瀉。  
已驚弱柳萬絲垂，尚有殘梅一枝亞。清詩獨吟還自和，  
白酒已盡誰能借。不辭青春忽忽過，但恐歡意年年謝。  
自知醉耳愛松風，會棟霜林結茆舍。浮浮大甌長吹玉。

金少卿集卷三  
卷三  
溜溜小槽如壓蔗飲中真味老更濃醉裏狂言醒可怕  
但當謝客對妻子倒冠落佩從嘲罵

任氏閱世堂前大檜

君家大檜長百尺根如車輪身絃直壯夫連臂不能抱  
孤鶴高飛直上立狂風動地舞枝榦大雪翻空洗顏色  
人言此檜三百年未知此是何人植君家大夫老不遇  
一生直氣未嘗屈沒身不說歸故里遺愛自知懷舊邑  
此翁此檜兩相似相與閱世終何極汝南山淺無良材

櫟社棟椽聊障日便令殺身起大厦亦恐衆材無匹敵  
且留枝葉撓雲霓猶得世人長嘆息

荊州 二首

遊人出三峽楚地盡平川北客隨南賈吳檣間蜀船江  
侵平野斷風捲白沙旋欲問興亡意重城自古堅

二

朱檻城東角高王北望沙江山非一國烽火是三巴戰  
骨淪秋草危樓倚斷霞百年豪傑盡擾擾見魚鰕

太白山下早行至橫渠鎮書崇壽院壁

馬上續殘夢不知朝日昇  
亂山橫翠障落月淡孤燈  
奔走煩郵吏安閒媿老僧  
再遊應眷眷聊亦記吾曾

人日惠州偶作

曉雨暗人日春愁連上元  
水生桃菜渚煙濕落梅村  
晚市人歸盡孤舟鶴踏翻  
猶堪慰寂寞漁火亂黃昏

暮歸

牛羊久已下寂寞掩柴扉  
水鶴鳴城堞飛螢上戟衣  
夜



涼江海近天闊斗牛微何日招舟子寒光北度歸

唐守携酒見訪用韻

箕踞狂歌老瓦盆燎毛燔肉似羗渾傳呼草市來携客  
灑掃漁磯共置樽山下黃童爭看舞江干白骨已銜恩

時詹方議  
葬暴骨

孤雲落日西南望長羨歸鴉自識村

正月二十六日偶遇數客野步嘉祐僧舍東南埜  
人家雜花盛開叩門求觀林媪出應白髮青裙少  
寡獨居三十年矣嘆息之餘作詩紀之

縹帶細枝出絳房綠陰青子送春忙涓涓泣露紫含笑  
焰焰燒空紅佛桑落日孤烟知客恨短離破屋為誰香  
主人白髮青裙袂子美詩中黃四娘

惠州近城數小山類蜀道春與進士許穀野步會  
意處飲之且醉作詩以記適參寥專使欲歸使持  
此以示西湖之上諸友庶使余未嘗一日忘湖山  
也

夕陽飛絮亂平蕪萬里春前酒一壺鐵化雙魚沉遠素

劍分二嶺隔中區  
花曾識面香仍好  
鳥不知名聲自呼  
夢想平生消未盡  
滿林煙月到西湖

贈清涼寺和長老

代北初辭沒馬塵  
江南來見臥雲人  
問禪不契前三語  
施佛空留丈六身  
老去山林徒夢想  
雨餘鐘鼓更清新  
會須一洗黃茅瘴  
未用深藏白氎巾

李鈇輅坐上分題戴花

二八佳人細馬駝  
十千美酒渭城歌  
簾前柳絮驚春晚

金定四八  
卷三  
頭上花枝柰老何  
露濕醉巾香掩冉  
月明歸路影婆娑  
綠珠吹笛何時見  
欲把斜紅插皂羅

儋州上元過子赴使君會

使君置酒莫相違  
守舍何妨獨掩扉  
臥看月窗蟠蜥蝎  
靜聞風幔落蜘蛛  
燈花結盡吾猶夢  
香篆消時汝欲歸  
回首淒涼十年事  
傳柑歸遺滿朝衣

秋晚客興

草滿池塘霜送梅  
踈林野色近樓臺  
天圍故越侵雲盡

潮上孤城帶月迴客夢冷隨楓葉斷愁心低逐鴈聲來  
流年又喜驚重九可意黃花是處開

留題仙遊潭中興寺寺東有玉女洞洞南有馬融  
讀書石室過潭而南山石益竒潭上有橋畏其險  
不可渡

清潭百尺皎無泥山木陰陰谷鳥啼蜀客曾遊明月峽  
秦人今在武陵溪獨攀書室窺岩竇還訪仙姝歛石闥  
猶有愛山心未至不將雙腳踏飛梯

九月二十日微雪懷子由弟

岐陽九月天微雪已作蕭條歲暮心短日送寒砧杵急  
冷官無事屋廬深愁腸別後能消酒白髮秋來已上簪  
近買貂裘堪出塞忽思乘傳問西琛

七月二十四日以久不雨出禱磻溪是日宿虢縣  
二十五日晚自虢縣渡渭宿于僧舍曾閣閣故曾  
氏所建也夜久不寐見壁有前縣令趙薦留名有

懷其人

龕燈明滅欲三更  
敲枕無人夢自驚  
深谷流風終夜響  
亂山銜月半牀明  
故人漸遠無消息  
古寺空來看姓名  
欲向磻溪問姜叟  
僕夫屢報斗杓傾

二十六日五更起行至磻溪未明

夜入磻溪如入峽  
照山炬火落驚猿  
山頭孤月耿猶在  
石上寒波曉更喧  
至人舊隱白雲合  
神物已化遺蹤蜿  
安得夢隨霹靂駕  
馬上傾倒天瓢翻

次韻杭州裴惟甫

餘杭門外葉飛秋尚記居人挽去舟一別臨平山上塔  
五年雲夢澤南州淒涼楚些緣吾發邂逅秦淮為子留  
寄語西湖舊風月故應時許夢中游

和仲伯達

歸山歲月苦無多尚有丹沙奈老何繡谷只應花自染  
鏡潭長與月相磨君方傍海看初日我已橫江擊素波  
人不我知斯我貴不須雷雨起龍梭

再和



憶觀滄海過東萊日照三山迤邐開  
玉觀飛樓凌霧起仙幢寶蓋拂天來  
不聞宮漏催晨箭但覺簷陰轉古槐  
供奉青班非老處會稽何日乞方回

時方闕  
會稽守

次韻王定國揚州倅

此身江海寄天游一落紅塵不易收  
未許相如還蜀道空教何遜在揚州  
又驚白酒催黃菊尚喜朱顏映黑頭  
火急著書千古事虞卿應未厭窮愁

送呂昌明知嘉州

不羨三刀夢蜀都聊將八詠繼東吳  
臥看古佛凌雲閣勅賜詩人明月湖  
得句會應緣竹鶴思歸寧復為尊鱸  
橫空好在修眉色頭白猶堪乞左符

座上復借韻送岢嵐軍通判葉朝奉

雲間踏白看纏旗莫忘西湖把酒時  
夢裏吳山連越嶠樽前羌婦雜蕃兒  
夕烽過後人初醉春鴈來時雪未滋  
為問從軍真樂否書來粗遣故人知

壽星院寒碧軒

清風蕭蕭搖牕扉  
牕前修竹一尺圍  
紛紛蒼雪落夏簾  
冉冉綠霧沾人衣  
日高山蟬抱葉響  
人靜翠羽穿林飛  
道人絕粒對寒碧  
為問鶴骨何緣肥

送杜介歸揚州

再入都門萬事空  
閑看清洛漾東風  
當年帷幄幾人在  
回首觚稜一夢中  
採藥會須逢薊子  
問禪何處識龐翁  
歸來鄰里應迎笑  
新長淮南舊桂叢

華陰寄子由

三年無日不思歸夢裏還家旋覺非臘酒送寒催去國  
東風吹雪滿征衣三峰已過天浮翠四扇行看日照扉  
里堠消磨不禁盡速携家餉勞驂駢

龜山

我生飄蕩去何求再過龜山歲五周身行萬里半天下  
僧臥一庵初白頭地隔中原勞北望湖連滄海欲東游  
元嘉舊事無人記故壘摧頽今在不

宋文帝遣將拒魏  
太武築城北山

莘老葺天慶觀小園有亭北向道士山崇說乞名

與詩

春風欲動北風微  
歸鴈亭邊送鴈歸  
蜀客南遊家最遠  
吳山寒盡雪先晞  
扁舟去後花枝亂  
五馬來時賓從非  
惟有道人應不忘  
抱琴無語立斜暉

次韻趙令鑠

東坡已報六年穰  
惆悵紅塵白首郎  
枕上溪山猶可見  
門前冠蓋已相忘  
故人年少真瓊樹  
落筆風生戰堵牆  
端向甕間尋吏部  
老來專以醉為鄉



宋藝圃集卷三

欽定四庫全書

集部  
宋藝圃集卷四

詳校官中書臣陸湘

侍讀臣孫球覆勘

總校官庶吉士臣何思鈞

校對官編修臣李堯棟

謄錄監生臣李元位

欽定四庫全書

宋藝圃集卷四

明 李萊 編

菴軾

縱筆

寂寂東坡一病翁  
白鬚蕭散滿霜風  
小兒誤喜朱顏在  
一笑那知是酒紅

題惠州范氏溪陰堂



金  
卷四  
白水滿時雙鷺下綠槐高處一蟬吟酒醒門外三竿日  
臥看溪南十里陰

題織錦圖上迴文

春晚落花餘碧草夜涼低月半秋桐人隨瘦馬邊城暮  
雨映疎簾繡閣空

紅手素絲千字錦故人新曲九迴腸風吹絮雪愁縈骨  
淚洒縑書恨見郎

羞看一首迴文錦似文君別恨深頭白自吟悲賦客

斷腸愁是斷絃琴

和人迴文 五首

紅窗小泣低聲怨永夕春寒斗帳空  
酒落花飛絮亂  
曉鶯啼破夢匆匆

晞草露如郎薄幸亂花飛似妾情多  
歸鴻見處揮珠淚  
語燕閒時斂翠娥

琴絃斷續愁兼恨嶺水分流西復東  
深院小扉紅日落  
繡窗閒倚更誰同

參橫霽色天沉水鳥宿寒枝竹鎖煙衾戀舊香清夜半  
淚凝殘燭畫堂前

寒宿霜風秋葉黃冷燈殘月照空牀看君寄意傳文錦  
字字愁縈苦斷腸

望海樓晚景

三首

青山斷處塔層層隔岸人家喚欲應江上秋風晚來急  
為傳鐘鼓到西興

海上濤頭一線來樓前指顧雪成堆從今潮上君須上

更看銀山二十回

橫風吹雨入船斜  
壯觀應須好句誇  
雨過湖平江海碧  
電光時掣紫金蛇

戲贈

惆悵沙河十里春  
一番花落一番新  
小樓依舊斜陽裏  
不見樓中垂手人

贈別

青鳥銜巾久欲飛  
黃鶯別主更悲啼  
慙莫忘分携處

湖水東邊鳳嶺西

追和子由去歲試舉人洛下所寄詩二首暴雨初

晴樓上晚景

洛邑從來天地中  
嵩高蒼翠北邙紅  
風流耆舊消磨盡

只有青山對病翁

謂富公也

客路三年不見山  
上樓相對夢魂間  
明朝却踏紅塵去  
羞向清伊照病顏

陌上花

陌上花開蝴蝶飛  
江山猶是昔人非  
遺民幾度垂垂老  
遊女長歌緩緩歸

送范德孺

漸覺東風料峭寒  
青蒿黃韭試春盤  
遙想慶州千嶂裏  
暮雲衰草雪漫漫

送惠州監押

一聲鳴雁破江雲  
萬葉梧桐卷露銀  
我自飄零是羈旅  
更堪秋晚送行人

題澄邁驛通潮閣

倦客愁聞歸路遙  
眼明飛閣俯長橋  
貪看白鷺橫秋浦  
不覺青林沒晚潮

夢中絕句

楸樹高花欲插天  
暖風遲日共茫然  
落英滿地君方見  
惆悵春光又一年

金山夢中作

江東賈客木棉裘  
會散金山月滿樓  
半夜潮來風又熟

臥吹簫管到揚州

書辨才白雲堂壁

不辭清曉叩松扉  
却值支公久不歸  
山鳥不鳴天欲雪  
卷簾惟見白雲飛

虔州八境圖

四首

濤頭寂寞打城還  
章顛臺前暮靄寒  
倦客登臨無限思  
孤雲落日是長安

白鵲樓前翠作堆  
縈雲嶺路若為開  
故人應在千山外



不寄梅花遠信來

朱樓深處日微明  
皂蓋歸時酒半醒  
薄暮漁樵人去盡  
碧溪青嶂遶螺亭

煙雲縹緲鬱孤臺  
積翠浮空兩半開  
想見之罘觀海市  
絳宮明滅是蓬萊

韓康公坐上侍兒求書扇

一一窻扉面水開  
更於何處覓蓬萊  
天香滿袂人知否  
曾到旃檀小殿來

書王定國所藏烟江疊嶂圖王晉卿畫

江上愁心千疊山浮空積翠如雲烟山耶雲耶遠莫知  
烟空雲散山依然但見兩崖蒼蒼暗絕谷中有百道飛  
來泉縈林絡石隱復見下赴谷口為奔川川平山開林  
麓斷小橋野店依山前行人稍度喬木外漁舟一葉江  
吞天使君何從得此本點檢毫末分清妍不知人間何  
處有此境徑欲往置二頃田君不見武昌樊口幽絕處東  
坡先生留五年春風搖江天漠漠暮雲捲雨山娟娟丹

楓翻鴉伴水宿長松落雪驚醉眠桃花流水在人世武  
陵豈必皆神仙江山清空我塵土雖有去路尋無緣還  
君此畫三嘆息山中故人應有招我歸來篇

寓居合江樓

海山葱朧氣佳哉二江合處朱樓開蓬萊方丈應不遠  
肯為蘇子浮江來江風初涼睡正美樓上啼鴉呼我起  
我今身世兩相違西流白日東流水樓中老人日清新  
天上豈有癡仙人三山咫尺不歸去一杯付與羅浮春

余家酿酒

名羅浮春

十一月二十六日松風亭下梅花盛開

春風嶺上淮南村昔年梅花曾斷魂  
豈知流落復相見  
蠻風颯雨愁黃昏  
長條半落荔枝浦  
臥樹獨秀枕榔園  
豈惟幽光留夜色  
直恐冷艷排冬溫  
松風亭下荆棘裏  
兩株玉蘂明朝暎  
海南僊雲嬌墮砌  
月下縞衣來扣門  
酒醒夢覺起繞樹  
妙意有在終無言  
先生獨飲勿歎息  
幸有落月窺清樽

再用前韻

羅浮山下梅花村玉雪為骨水為魂紛紛初疑月挂樹  
耿耿獨與參橫昏先生索居江海上悄如病鶴栖荒園  
天香國艷肯相顧知我酒熟詩清溫蓬萊宮中花鳥使  
綠衣倒挂扶桑暎抱叢窺我方醉臥故遣啄木先敲門  
麻姑過君急洒掃鳥能歌舞花能言酒醒人散山寂寂  
惟有落藥黏空樽

遊桓山會者十人以春水滿四澤夏雲多奇峯為

韻得澤字

東郊欲尋春未見鶯花迹春風在流水鳧雁先拍拍孤  
帆信溶漾弄此半篙碧艤舟桓山下長嘯理輕策彈琴  
石室中幽響清磔磔弔彼泉下人野火失枯腊悟此人  
間世何者為真宅暮回百步洪散坐洪土石媿我非王  
襄子淵肯見客臨流吹洞簫水月照連壁此歡真不朽  
回首歲月隔想像斜川遊作詩寄彭澤

贈寫真何秀才

君不見潞州別駕眼如電左手掛弓橫撚箭又不見雪中騎驢孟浩然皺眉吟詩肩聳山饑寒富貴兩安在空有遺像留人間此身常擬同外物浮雲變化無蹤跡問君何苦寫我真君言好之聊自適黃冠野服山家客意欲置我山巖中勲名將相今何限往寫褒公與鄂公

薄薄酒

薄薄酒勝茶湯粗粗布勝無裳醜妻惡妾勝空房五更待漏靴滿霜不如三伏日高睡足北窗涼珠襦玉匣萬

人祖送歸北邙不如懸鶉百結獨坐負朝陽生前富貴  
死後文章百年瞬息萬世忙夷齊盜跖俱亡羊不如眼  
前一醉是非憂樂都兩忘

西湖秋酒東池魚窘甚因會客呼網師遷之西池  
為一笑之樂夜歸被酒不能寢戲作放魚一首

東池浮萍半枯塊裂碧跳青出魚背西池秋水尚涵空  
舞閣搖深吹荇帶吾僚有意為遷居太守縱饒那忍鱸  
縱橫爭看銀刀出澆滸初驚玉花碎但愁數罟損鱗鬣



未信長堤隔濤瀨  
瀼瀼發發須臾間  
圍圍洋洋尋丈外  
安知中無蛟龍種  
尚恐或有風雲會  
明年春水漲西湖  
好去相忘渺湖海

蜜酒歌

西蜀道士楊世昌善作蜜酒絕醇醱余得其法作此歌遺之

真珠為漿玉為醴  
六月田夫汗流泚  
不如春甕自生香  
蜂為耕耘花作米  
一日小沸魚吐沫  
二日眩轉清光活  
三日開甕香滿城  
快瀉銀瓶不須撥  
百錢一斗濃無聲  
甘露微濁醍醐清  
君不見南園採花蜂  
如雨天教釀酒

醉先生先生年來窮到骨問人乞米何曾得世間萬事  
真悠悠蜜蜂大勝監河侯

號國夫人夜遊圖

佳人自輕玉花驄翩如驚燕踏飛龍金鞭爭道寶釵落  
何人先入明光宮宮中羯鼓催花柳玉奴絃索花奴手  
坐中八姨真貴人走馬來看不動塵明眸皓齒誰復見  
只有丹青餘淚痕人間俯仰成今古吳公臺下雷塘路  
當時一笑潘麗華不知門外韓擒虎

定惠院海棠

江城地瘴蕃草木只有名花苦幽獨  
嫣然一笑竹籬間桃李漫山總麤俗也  
知造物有深意故遣佳人在空谷  
自然富貴出天姿不待金盤薦華屋  
朱唇得酒暈生臉翠袖卷紗紅映肉  
林深霧暗曉光遲日暖風輕春睡足  
雨中有淚亦悽慘月下無人更清淑  
先生食飽無一事散步逍遙自捫腹  
不問人家與僧舍拄杖敲門看修竹  
忽逢絕艷照衰朽歎息無言揩病目  
陋邦何處得此花

無乃好事移西蜀寸根千里不易到銜子飛來定鴻鵠  
天涯流落俱可念為飲一樽歌此曲明朝酒醒還獨來  
雪落紛紛那忍觸

留題仙都觀

山前江水流浩浩山上蒼蒼松栢老舟中行客去紛紛  
古今換易如秋草空山樓觀何崢嶸真人王遠陰長生  
飛符御氣朝百靈悟道不復誦黃庭龍車虎駕下來迎  
去如旋風搏紫清真人厭世不回顧世間生死如朝露學

仙度世豈無人餐霞絕粒長苦辛安得獨從逍遙君冷  
然乘風駕浮雲超世無有我獨行

續麗人行

深宮無人春日長沉香亭北百花香美人睡起薄梳洗  
燕語鶯啼空斷腸畫工欲畫無窮意背立春風初破睡  
若教回首却嫣然陽城下蔡俱風靡杜陵饑客眼常寒  
蹇驢破帽隨金鞍隔花臨水時一見只許腰肢背後看  
心醉歸來茅屋裏方信人間有西子君不見孟光舉案

與齊眉何曾背面傷春啼

月夜與客飲酒杏花下

杏花飛簾散餘春  
明月入戶尋幽人  
褰衣步月踏花影  
烟如流水涵青蘋  
花間置酒清香發  
爭挽長條落香雪  
山城薄酒不堪飲  
勸君且吸杯中月  
洞簫聲斷月明中  
惟憂月落酒杯空  
明朝卷地春風惡  
但見綠葉栖殘紅

題王逸少帖

顛張醉素兩禿翁  
追逐世好稱書工  
何曾夢見王與鍾

妄自粉飾欺盲聾有如市倡抹青紅妖歌嫚舞眩兒童  
謝家夫人淡丰容蕭然自有林下風天門蕩蕩驚跳龍  
山林飛鳥一掃空為君草書續其終待我他日不怱怱

四月十一日初食荔支

南村諸楊壯村盧白花青葉冬不枯垂黃綴紫煙雨裏  
特與荔支為先驅海山仙人絳羅襦紅紗中單白玉膚  
不須更待妃子笑風骨自是傾城姝不知天工有意無  
遣此尤物生海隅雲山得伴松檜老霜雪自困楂梨麤

先生洗琰酌桂醕冰槃薦此頽虬珠似開江鯨斫玉柱  
更洗河豚烹腹腴我生涉世本為口一官久已輕尊鱸  
人間何者非夢幻南來萬里真良圖

石蒼舒醉墨堂

人生識字憂患始姓名粗記可以休何用草書誇神速  
開卷愴恍令人愁我嘗好之每自笑君有此病何年瘳  
自言其中有真樂適意無異逍遙游近者作堂名醉墨  
如飲斗酒消百憂乃知劉子語不妄病嗜土炭如珍羞



君於此藝亦云至堆墻敗筆如山丘興來一揮百紙盡  
駿馬倏忽踏九州我書意造本無法點畫信手煩推求  
胡為議論獨見假隻字片紙皆藏收不減鍾王君自取  
下方羅趙我亦優不須臨池更苦學完取絹素充衾裯

李公擇求黃鶴樓詩因記舊所聞於馮當世者

黃鶴樓前月滿川抱關老卒饑不眠夜間三人笑語言  
羽衣著屐響空山非鬼非人意其仙石扉三叩聲清圓  
洞中鏗鏜落門闕縹緲入石如飛烟雞鳴月落風馭還

迎拜稽首願執鞭汝非其人骨腥膻黃金乞得重莫肩  
持歸包裹弊席氈夜穿茅屋光射天里閭來觀已變遷  
似石非石鉛非鉛或取而有衆忿喧訟歸有司今幾年  
無功暴得喜欲顛神仙戲汝真可憐願君為考然不然  
此語可信馮公傳

贈馮真李道士

君不見景靈今殿圖功臣進賢大策東西陳能令將相  
長在世自古獨有曹將軍嵩高李師掉頭笑自言弄筆

曹前身百世遺像誰復識滿朝冠劍多偉人據鞍一見  
心有得臨軒相對疑通神十年江海鬚半脫歸來俯仰  
慚簪紳一揮七尺傍牆立客來顧我誠似君金章紫綬  
本非有綠鬢黃鶻甘長貧何如畫作老白衣置之茆屋  
全吾真

法惠寺橫翠閣

朝見吳山橫暮見吳山從吳山故多態轉側為君容幽  
人起朱閣空洞更無物惟有千步岡東西作簾額春來

故國歸無期  
人言悲秋春更悲  
已泛平湖思濯錦  
更看橫翠憶我眉  
彫欄能得幾時好  
不獨憑欄人易老  
百年興廢更堪哀  
懸知草莽化池臺  
遊人尋我舊遊處  
但覓吳山橫處來

三峽橋

吾聞太山石積日穿綫溜  
況此百雷霆萬世與石闔  
深行九地底險出三峽  
石長輪不盡溪欲滿無底  
竇跳波翻潛魚震響落飛  
狖清寒入山骨草木盡  
堅瘦空濛烟

雷間傾洞金石奏灣灣飛橋出激激半月鼓玉淵神龍  
近雨電亂晴晝垂瓶得清甘可嚙不可嗽

城南縣尉水亭得長字

兩尉鬱相望東西百步場揮旗蒲柳市伐鼓水雲鄉  
已作觀魚檻仍開射鴨堂全家依畫舫極目亂紅粧  
灩灩波頭細疎疎雨脚長我來閒濯足溪漲欲浮牀  
澤國山圍裏孤城水影旁欲知歸路處葦外記風  
檣

江月 五首

一更山吐月玉塔卧微瀾正似西湖上湧金門外看冰  
輪橫海濶香霧入樓寒停鞭且莫上照我一杯殘

二更山吐月幽人方獨夜可憐人與月夜夜江樓下風  
枝夕未停露草不可藉歸來掩闕卧唧唧蟲夜話

三更山吐月棲鳥亦驚起起尋夢中遊清絕正如此驅  
雲歸衆宿俯仰迷空水幸可飲我牛不須違洗耳

四更山吐月皎皎為誰明幽人赴我約坐待玉繩橫野

橫多斷板山寺有微行今夕定何夕夢中游化城  
五更山吐月窗迴室幽幽玉鈞還挂戶江練却明樓星  
河澹欲曉鼓角冷知秋不眠翻五詠清切變蠻謳

歸去來詞集字

寄傲疑今是求榮感昨非聊欣樽有酒不恨室無衣丘  
壑世情遠田園生事微庭柯還獨暝時有鳥歸飛

廣慶寺朱瑤畫

朱瑤唐晚輩得法尚雄深滿寺空遺跡何人識苦心長

廊敲雨脚破壁撼鐘音成壞無窮事他年復弔今

倦夜

敲枕倦長夜小窗猶未明孤村一犬吠殘月幾人行衰  
鬢久已白旅懷空自清荒園有絡緯虛織竟何成

和韋蘇州詩寄鄧道士

一杯羅浮春遠餉採薇客遙知獨酌罷醉臥松下石幽  
人不可見清嘯聞月夕聊戲庵中人空飛本無迹

禽言



南山昨夜雨西溪不可渡溪邊布穀兒勸我脫布袴  
不辭脫袴溪水寒水中照見催租瘢

挽滕達道

雲夢連江雨樊山落木秋公方占賈鵬我正買龔牛共  
有江湖樂空懷畎畝憂荆溪欲歸老浮玉偶同游骭髀  
儀型在驚呼歲月邁回頭雜歌哭挽語不成謳

鬱孤臺和許朝奉

高門元世舊客路晚追遊清絕聞詩語疏通豈法流傳

家有衣鉢斷獄盡春秋邂逅陪車馬尋芳謝眺洲淒涼  
望鄉園得句仲宣樓恨賦投湘水悲歌祀柳州何如五  
字律相與一樽留更約登塵外歸時月滿舟

祭常山回小獵

青蓋前頭點皂旗黃茅岡下出長圍弄風驕馬跑空立  
趁兔蒼鷹掠地飛回望白雲生翠巘歸來紅葉滿征衣  
聖朝若用西涼簿白羽猶能效一揮

有美堂暴雨

遊人脚底一聲雷  
滿坐頑雲撥不開  
天外黑風吹海立  
浙東飛雨過江來  
十分激灩金樽凸  
千丈敲鏗羯鼓催  
喚起謫仙泉灑面  
倒傾鮫室瀉瓊瑰

次韻穆父尚書侍祠郊丘瞻望天光退而相慶引  
滿醉吟一首

千章杞梓蔭雲天  
樗散誰收老鄭虔  
喜氣到君浮白裏  
豐年及我掛冠前  
令嚴鐘鼓三更月  
野宿貔貅萬竈煙  
太息何人知帝力  
歸來金帛看頽肩

次韻晁無斁春懷

城郭朝陽散積陰  
郊原注目日清深  
年衰鷗鷺如今是  
夢斷邯鄲何處尋  
語鵲飛烏春稍稍  
重簾深院晚沉沉  
不辭杖履衝泥雪  
未有瓊琚報好音

過嶺寄子由

七年來往我何堪  
又試曹谿一勺甘  
夢裏似曾遷海外  
醉中不覺到江南  
波生濯足鳴空澗  
霧繞征衣滴翠嵐  
誰遣山雞忽驚起  
半巖花雨落毵毵

天竺寺

香山居士留遺迹  
天竺禪師有故家  
空詠連珠吟疊壁  
已亡飛鳥失驚蛇  
林深野桂寒無子  
雨浥山薑病有花  
四十七年真一夢  
天涯流落淚橫斜

贈王子真秀才

萬里雲山一破裘  
杖端閒掛百錢遊  
五車書已留兒讀  
二頃田應為鶴謀  
水底笙歌蛙兩部  
山中奴婢橘千頭  
幅巾我欲相隨去  
海上何人識故侯

此詩前六句  
皆用數目字

出潁口初見淮山

我行日夜見江海，楓葉蘆花秋興長。  
平淮忽迷天遠近，青山久與船低昂。  
壽州已見白石塔，短棹又轉黃茅岡。  
波平風軟望不到，故人久立天蒼茫。

見一作向  
又一作未

送子由之契丹

雲海相忘寄此身，那因遠適更傷神。  
不辭驛騎凌風雪，要使天驕識鳳麟。  
沙漠回看清禁月，湖山應夢武陵春。  
單于若問君家世，莫道中朝第一人。

賀陳述古弟章生子

鬱蔥佳氣夜充閭始見徐卿第二雛甚欲去為湯餅客  
惟愁錯寫弄麈書參軍新婦賢相敵阿大中郎喜有餘  
我亦從來識英物試教啼看定何如

贈惠山僧惠表

行遍天涯意未闌將心到處遣人安山中老宿依然在  
案上楞嚴已不看敲枕落花餘幾片閉門修竹自千竿  
客來茶罷空無有盧橘楊梅尚帶酸

西太一見王荊公舊詩偶次其韻二首

秋早川原淨麗雨餘風日清  
酣從此歸耕劔外何人送  
我池南

但有尊中若下何須墓上征  
西聞道烏衣巷口而今烟  
草萋迷

靈上訪道人不過

花光紅滿欄草色綠無岸  
不逢青眼人長歌白石爛

安節姪將去作小詩送之



索漠齊安郡從來著放臣如何風雪裏更送獨歸人

題贈田辨之琴姬

流水隨絃滑清風入指寒坐中有狂客莫近繡簾彈

梅花

二首

春來幽谷水潺潺的皜梅花草棘間一夜東風吹石裂  
半隨飛雪渡關山

何人把酒慰深幽開自無聊落更愁幸有清溪三百曲  
不辭相送到黃州

中秋月

暮雲收盡溢清寒，銀漢無聲轉玉盤。  
此生此夜不長好，明月明年何處看。

春宵

春宵一刻直千金，花有清香月有陰。  
歌管樓臺聲細細，鞦韆院落夜沉沉。

上元侍宴

淡月疎星繞建章，仙風吹下御爐香。  
侍臣鵠立通明殿

一朶紅雲捧玉皇

海棠

東風嫋嫋汎崇光  
香霧空濛月轉廊  
只恐夜深花睡去  
故燒高燭照紅粧

遊三茅洞

凍雨飛飛半成雪  
遊人屨冷蒼苔滑  
不辭攜被巖底眠  
洞口雲深夜無月

惠崇春江曉景

竹外桃花三兩枝，春江水暖鴨先知。  
萋萋滿地蘆芽短，正是河豚欲上時。

澄邁驛通潮閣

餘生欲老海南村，帝遣巫陽招我魂。  
杳杳天低鶻沒處，青山一髮是中原。

六月二十七日望湖樓醉書

三首

黑雲翻墨未遮山，白雨跳波亂入船。  
卷地風來忽吹散，望湖樓下水如天。

放生魚鼈逐人來無主荷花到處開  
水枕能令山俯仰  
風船解與月徘徊

獻花遊女木蘭橈  
細雨斜風濕翠翹  
無限芳洲生杜若  
吳兒不識楚詞招

雜詩

窗搖細浪魚吹日  
手弄黃花蝶透衣  
不覺春風吹酒醒  
空教明月伴人歸

東欄梨花

梨花淡白柳深青，柳絮飛時花滿城。  
惆悵東欄一株雪，人生看得幾清明。

和子由逍遙堂詩

別期漸近不堪聞，風雨蕭蕭已斷魂。  
猶勝相逢不相識，形容變盡語音存。

僕年三十九在潤州道上過除夜作此詩又二十  
年在惠州錄之以示過

寺官官小未朝參，紅日半窗春睡酣。  
為報鄰雞莫驚覺

金  
卷四  
更容殘夢到江南

吉祥寺花將落而述古不至

今歲東風巧翦裁  
含情只待使君來  
對花無信花應恨  
直恐明年便不開

述古聞之明日即來坐上復用前韻同賦

仙衣不用剪刀裁  
國色初酣卯酒來  
太守問花花不語  
為君零落為君開

於潛令刁同年野翁亭

山翁不出山溪翁長在溪不如野翁來徃溪山間上友  
麋鹿下鳧鷖問翁何所樂三年不去煩推擠翁言此間  
亦有樂非絲非竹非蛾眉山醉後鐵冠落溪女笑時  
銀櫛低我來觀政問風謠皆云吠犬足生羸但恐此翁  
一旦舍此去長使山人索寞溪女啼

天目山唐道士常冠鐵冠於潛婦女

皆挿大銀櫛長尺許謂之蓬宿

### 登常山絕頂廣麗寺

西望穆陵關東望琅琊臺南望九仙山北望空飛埃相



將叫虞舜遂欲歸蓬萊嗟我二三子狂飲亦荒哉紅裙  
欲先去長笛有餘哀清歌入雲霄妙舞纖腰回自從有  
此山白石封蒼苔何嘗有此樂將去復徘徊人生如朝  
露白髮日夜催棄置當何言萬劫終飛灰

和子由送將官梁左藏仲通

雨足誰言春麥短城堅不怕秋濤卷日長惟有睡相宜  
半脫紗巾落紈扇芳草不鋤當戶長珍禽獨下無人見  
覺來身世都是夢坐久枕痕猶著面城西忽報故人來

急掃風軒吹麥飯伏波論兵初矍鑠中散談仙更清遠  
南都從事亦學道不恤腸空誇腦滿問羊他日到金華

應許相將游閬苑

黃初平之兄尋其弟於金華山

### 大風留金山兩日

塔上一鈴獨自語明日顛風當斷渡朝來白浪打蒼崖  
倒射軒窗作飛雨龍驤萬斛不敢過漁艇一葉從掀舞  
細思城市有底忙却笑蛟龍為誰怒無事久留童僕怪  
此風聊得妻孥許滿山道人獨何事半夜不眠聽粥鼓

陪歐陽公讌西湖

謂公方壯鬚似雪謂公已老光浮頰渴來湖上飲美酒  
醉後劇談猶激烈湖邊草木新着霜芙蓉晚菊爭煌煌  
插花起舞為公壽公言百歲如風狂赤松共遊也不惡  
誰能忍饑啖仙藥已將天壽付天公彼徒辛苦吾差樂  
城上烏棲暮靄生銀缸盡燭照湖明不辭歌詩勸公飲  
坐無桓伊能撫箏

安國寺尋春

臥聞百舌呼春風起尋花柳村村同城南古寺修竹合  
小房曲檻敲深紅看花歎老憶年少對酒思家愁老翁  
病眼不羞雲母亂鬢絲強理茶烟中遙知二月王城外  
玉仙洪福花如海薄羅勻霧蓋新粧快馬爭風鳴雜佩  
玉川先生真可憐一生耽酒終無錢病過春風九十日  
獨抱添丁看花發

王齊萬秀才寓居武昌縣劉郎洲正與伍洲相對  
伍子胥奔吳所從渡江也

君家稻田冠西蜀，擣玉揚珠三萬斛。塞江流柿起書樓，  
碧瓦朱欄照山谷。傾家取樂不論命，散盡黃金如轉燭。  
惟餘舊書一百車，方舟載入荆江曲。江上青山亦何有，  
伍洲遙望劉郎藪。明朝寒食當過君，請殺耕牛壓私酒。  
與君飲酒細論文，酒酣訪古江之濱。仲謀公瑾不須弔，

一酌波神英烈君

杭州伍子胥廟封英烈王

陳季常自岐亭見訪郡中及舊州諸豪爭欲邀致  
之戲作陳孟公詩一首

孟公好飲寧論斗醉後關門防客走不妨閒過左阿君  
百謫終為賢太守老居閭里自浮沈笑問伯松何苦心  
忽然載酒從陋巷為愛揚雄作酒箴長安富兒求一過  
千金壽君君笑唾汝家安得客孟公從來只識陳驚座

武昌銅劍歌

雨餘江清風卷沙雷公躡雲捕黃蛇蛇行空中如枉矢  
電光煜煜燒蛇尾或投以塊鏗有聲雷飛上天蛇入水  
水上青山如削鐵神物欲出山自裂細看兩脅生碧花

猶是西江老蛟血蘇子得之何所為  
崩緹彈鋏詠新詩  
君不見凌烟功臣長九尺腰間玉具高挂頤

石芝

空堂明月清且新幽人睡息來初勻  
了然非夢亦非覺  
有人夜呼祁孔賓披衣相從到何許  
朱欄碧井開瓊戶  
忽驚石上堆龍蛇玉芝紫笋生無數  
鏘然敲折青珊瑚  
味如蜜藕和雞蘇主人相顧一撫掌  
滿堂坐客皆盧胡  
亦知洞府朝輒脫終勝嵇康羨王烈  
神山一合五百年

風吹石髓堅如鐵

郭祥正家醉盡竹石壁上郭作詩為謝且遺古銅

劍二

空腸得酒芒角出肝肺槎牙生竹石森然欲作不可回  
吐向君家雪色壁平生好詩仍好畫書牆浣壁長遭罵  
不嗔不罵喜有餘世間誰復如君者一雙銅劍秋水光  
兩首新詩爭劍銑劍在牀頭詩在手不知誰作蛟龍吼

眉子石硯歌贈胡閤



君不見成都畫手開十眉橫雲却月爭新奇游人指點  
小顰處中有漁陽鐵馬嘶又不見王孫青瑣橫雙碧腸  
斷浮空遠山色書生性命何足論坐費千金買消渴爾  
來喪亂愁天公謫向君家書硯中小窗虛幌相嫵媚令  
君曉夢生春紅毗耶居士談空處結習已空花不住試  
教天女為磨鉛千偈瀾翻無一語

觀杭州鈐轄歐育刀劍戰袍

青綾納衫暖襯甲紅線勒巾光繞脅禿襟小袖鵬鷖盤

大刀長劍龍蛇插兩軍鼓噪屋瓦墜紅塵白羽紛相戛  
將軍恩重此身輕笑履鋒鏑如一搯書生只肯坐帷幄  
談笑毫端弄生殺叫呼擊鼓催上竿猛士應憐小兒黠  
試問黃河夜偷渡掠面驚沙寒霎霎何如大艦日高眠  
一枕清風過茗雪

書林逋詩後

吳儂生長湖山曲呼吸湖光飲山渌不論世外隱君子  
傭兒販婦皆水玉先生可是絕俗人神清骨冷無由俗

我不識君曾夢見  
瞳子瞭然光可燭  
遺篇妙字處處有  
步繞西湖看不足  
詩如東野不言寒  
書似西臺差少肉  
平生高節已難繼  
將死微言猶可錄  
自言不作封禪書  
更肯悲吟白頭曲  
我笑吳人不好事  
好作祠堂傍修竹  
不然配食水仙王  
一盞寒泉薦秋菊

海市

并序

予聞登州海市舊矣  
父老云常出於春夏  
今歲晚不復見矣  
予到官五日而去  
以不見為恨禱

於海神廣德王之廟明日見焉乃作是詩

東方雲海空復空羣仙出沒空明中蕩搖浮世生萬象  
豈有貝闕藏珠宮心知所見嗜幻影敢以耳目煩神工  
歲寒水冷天地閉為我起蟄鞭魚龍重樓翠阜出霜曉  
異事驚倒百歲翁人間所得容力取世外無物誰為雄  
率然有請不我拒信我人厄非天窮潮陽太守南遷歸  
喜見石廬堆祝融自言正直動山鬼豈知造化哀龍鍾  
信眉一笑豈易得神之報汝亦已豐斜陽萬里孤鳥沒

但見碧海磨青銅  
新詩綺語亦安用  
相與變滅隨東風

過萊州雪後望三山

東海如碧環  
西北卷登萊  
雲光與天色  
且到三山回  
我行適冬仲  
薄雪收浮埃  
黃昏風絮定  
半夜扶桑開  
參差大華頂  
出沒雲濤堆  
安期與羨門  
乘龍安在哉  
茂陵秋風客  
勸爾麾一杯  
帝鄉不可期  
楚些招歸來

武昌西山并序

嘉祐中翰林學士承旨鄧公聖求為武昌令常

遊寒溪西山中人至今能言之軾謫居黃岡  
與武昌相望亦常往來溪山間元祐元年十一  
月二十九日考試館職與聖求會宿玉堂偶話  
舊事聖求嘗作元次山窪樽銘刻之巖石因為  
此詩請聖求同賦當以遺邑人使刻之銘側

春江淥漲蒲萄醅武昌官柳知誰栽憶從樊口載春酒  
步上西山尋野梅西山一上十五里風駕兩掖飛崔嵬  
同遊困臥九曲嶺褰衣獨到吳王臺中原北望在何許

但見落日低黃埃歸來解劔亭前路蒼崖半入雲濤堆  
浪翁醉處今尚在石臼杯飲無樽罍爾來古意誰復嗣  
公有妙語留山隈至今好事除草棘常恐野火燒蒼苔  
當時相望不可見玉堂正對金鑿開豈知白首同夜直  
臥看椽燭高花摧江邊曉夢忽驚斷銅環玉鎖鳴春雷  
山人帳空猿鶴怨江湖水生鴻雁來請公作詩寄父老  
徃和萬壑松風哀

次韻孔常父送張天覺河東提刑

送君應典鷓鴣裘憑仗千鍾洗別愁脫帽風流餘長史

君喜草書而不工故以此為戲

埋輪家世本留侯

張綱子房七世孫也捷為武陽人墓在今

彭山君豈其後耶

子河駿馬方爭出

麟府馬出于河泌

昭義疲兵亦少

休

唐昭義步兵益澤潞弓箭手

定向秋山得嘉句故關黃葉滿行舟

送喬全寄賀君二首

賀水部唐末五代人宋真宗東封謁于道左

曾謁東封玉輅塵幅巾短褐亦逡巡行宮夜奏空名姓  
悵望雲霞縹緲人

舊聞父老晉郎官已作飛騰變化看聞道東蒙有居處



願供薪水看燒丹

慶源宣義王丈以累舉得官為洪雅主簿雅州戶  
掾遇吏民如家人人安樂之既謝事居眉之青神  
瑞草橋放懷自得有書來求紅帶既以遺之且作  
詩為戲請黃魯直學士秦少游賢良各為賦一首  
為老人光華

青衫半作霜葉枯遇民如兒吏如奴吏民莫作官長看  
我是識字耕田夫妻啼兒號刺史怒時有野人來挽須

拂衣自注下下考芋魁飯豆吾豈無歸來瑞草橋邊路  
獨游還佩平生壺慈姥巖前自喚渡青衣江上人爭扶  
今年蠶市數州集中有遺民懷袴襦邑中之黔相指似  
白髯紅帶老不癯我欲西歸卜鄰舍隔墻拊掌容歌呼  
不學山王乘駟馬回頭空指黃公壚

次前韻送程六表弟

君家兄弟真連璧門十朱輪家萬石竹使猶分刺史符  
尚方行贈尚書爲前年持節發倉廩到處賣刀收鹽粟

歸來閉口不論功，却走渡江誰復恤。君才不用如澗松，  
我老得全猶社櫟。青衫莫厭百僚底，白首上有千薪積。  
憶昔江湖一釣舟，無數雲山供點筆。未應便障西風扇，  
只恐先移北山檄。憑君寄謝江南叟，念我空見長安日。  
浮江沂蜀有成言，江水在此吾不食。

戲書李伯時畫御馬好頭赤

山西戰馬飢無肉，夜嚼長稽如嚼竹。蹄間三丈是徐行，  
不信天山有坑谷。豈如廐馬好頭赤，立仗歸來臥斜日。

莫教優孟卜葬地厚衣薪爇入銅厯

次韻子由使契丹至涿州見寄

羶毳年來亦甚都時時鳩舌問三蘇那知老去渾無用  
欲問君王乞鏡湖

十月十四日以病在告獨酌

翠栢不知秋空庭失搖落幽人得佳蔭露坐方獨酌月  
華稍澄穆霧氣尤清薄小兒亦何知相語翁正樂銅爐  
燒柏子石鼎煮山藥一盃賞月露萬象紛醕酢此生獨

何幸風纜欣初泊  
逝逃顏蹠網行赴  
松喬約莫嫌風有  
待漫欲戲寥廓  
冷然心境空髣髴  
來笙鶴

書丹元子所示李太白真

天人幾何同一漚  
謫仙非謫乃其遊  
麾斥八極隘九州  
化為兩鳥鳴相酬  
一鳴一止三千秋  
開元有道為少留  
縻之不可矧肯求  
西望太極橫峨岷  
眼高四海空無人  
大兒汾陽中令君  
小兒天台坐忘真  
生年不知高將軍  
手汗吾足乃敢瞋  
作詩一笑君應聞

次韻范純父涵星硯月石風林屏詩一首

月次于房歷三星斗牛不神箕獨靈簸搖桑榆盡西靡  
影落蘇子硯與屏天工與我兩厭事孰居無事為此形  
與君持橐侍帷幄同到溫室觀堯箕自憐太史牛馬走  
技等卜祝均倡伶欲留衣冠挂神武便擊雲水歸南溟  
陶泓不稱管城沐醉石可助平泉醒故持二物與夫子  
欲使妙質留天庭但令滋液到枯槁勿遣光景生晦冥  
上書挂名豈待我獨立自可當雷霆我時醉眠風林下

夜與漁火同青熒撫物懷人應獨嘆作詩寄子誰當聽

連州追錄

卷卷長廊走黃葉席簾垂地香烟歇主人待來終不來  
火紅消盡灰如雪

贈僧

道人自嫌三世將棄家十年今始壯玉骨猶含富貴餘  
漆腫已照人天上去年相見古長干衆中矯矯如翔鷹  
今年過我江西寺病瘦已作霜松寒朱顏不變供歲月

風中萬火湯中雪好問君家黃面翁  
乞得摩尼照生滅  
莫學王郎與支遁臂鷹走馬憐神駿  
還君畫圖君自收  
不如木人騎土牛

捷為王氏書樓

樹林幽翠滿山谷樓觀突兀起江濱  
云是昔人藏書處  
磊落萬卷今生塵江邊日出紅霧散  
綺窗盡閣青氛氤  
山猿悲嘯泉谷響野鳥嘒戛巖花春  
借問主人今何在  
被甲遠戍長苦辛先登博戰事斬級  
區區何者為三墳



書生古亦有戰陣  
葛巾羽扇揮三軍  
古人不見悲世俗  
回首蒼山空白雲

過宜賓見夷中亂山

江寒晴不知遠見  
山上日朦朧含高峯  
晃蕩射峭壁橫  
雲忽飄散翠樹紛  
厯厯行人挹孤光  
飛鳥投遠碧蠻荒  
誰復愛穠秀安可  
適豈無避世士高  
隱鍊精魄誰能從  
之遊路有豺虎迹

舟中聽大人彈琴

彈琴江浦夜漏永歛衽竊聽獨激昂風松瀑布已清絕  
更愛玉珮聲琅璫自從鄭衛亂雅樂古器殘缺世已忘  
千年寥落獨琴在有如老仙不死閱興亡世人不容獨  
反古強以新曲求鏗鏘微音淡弄忽變轉數聲浮脆如  
笙簧無情枯木今尚爾何況古意墮渺茫江空月出人  
響絕夜闌更請彈文王

竹葉酒

楚人汲漢水釀酒古宜城春風吹酒熟猶似漢江清者

舊人何在丘墳應已平  
惟餘竹葉在留此千古情

渚宮

渚宮寂寞依古郢  
楚地荒茫非故基  
二王臺閣已鹵莽

湘東王  
高氏

何況遠問縱橫時  
楚王獵罷擊靈鼓  
猛士操舟

張水嬉釣魚不復數  
魚鼈大鼎烹  
蛟螭當時郢人

架宮殿意思絕妙般  
與倭飛樓百尺照湖水  
上有燕趙

千娥眉臨風揚揚意  
自得長使宋玉作楚詞  
秦兵西來

取鐘簾故宮禾黍秋  
離離千年壯觀不可復  
今之存者

蓋已卑池空野迥樓閣小惟有深竹藏狐狸臺中絳帳  
誰復見臺下野水一作鴨浮清猗綠窗朱戶春書閉想見  
深屋彈朱絲腐儒亦解愛聲色何用白首談孔姬沙泉  
半涸艸堂在破窗無紙風颼颼陳公蹤跡最未遠士瑞  
寥落今何之百年人事知幾變直恐荒廢成空陂誰能  
為我訪遺迹草中應有湘東碑

昭陵六馬唐文皇戰馬也琢石象之立昭陵前容

有持此石本示予為賦之

此首一作  
張文潛詩

天將剗隋亂帝遣六龍來森然風雲姿颯爽毛骨開  
馳不及視山川儼莫回長鳴視八表擾擾萬駘駘秦王  
龍鳳姿魚鳥不足摧腰間太白羽中物如風雷區區數  
豎子搏取若捉孩手持掃天第六合無塵埃艱難濟大  
業一一非常才維時六驥足績與英衛陪功成鋸八鸞  
玉輅行天街荒涼照陵闕古石埋蒼苔

驪山

君門如天深幾重君王如帝坐法宮人生難處是安穩

何為來此驪山中  
複道凌雲接金闕  
樓觀隱烟橫翠空  
林深霧暗迷八駿  
朝東暮西勞六龍  
六龍西幸峨眉棧  
悲風便入華清院  
霓裳蕭散羽衣空  
麋鹿來游猿鶴怨  
我上朝元春半老  
蒲地落花無人掃  
羯鼓樓高掛夕陽  
長生殿古生青草  
可憐吳楚兩醜雞  
築臺未就已堪悲  
長楊五柞漢幸免  
江都樓戍隋自迷  
由來留連多喪國  
宴安酖毒因奢惑  
三風十愆古所戒  
不必驪山可亡國

寒食夜

漏聲透入窗窻紗人靜鞦韆影半斜沉麝不燒金鴨冷  
淡雲籠月照梨花

秋興

故里依然一夢前相攜重上釣魚船常陪大幙今陳迹  
謬忝承明愧昔年報國無成空白首退耕何處有名田  
黃雞白酒雲山約此計當時已浩然

移合浦郭功甫見寄

君恩浩蕩似陽春合浦何如在海濱莫趁明珠弄明月

夜深無數採珠人

讀開元天寶遺事 三首

姚宋亡來事事興  
一官銖重萬人輕  
朔方老將風流在  
不取西蕃石堡城

潭裏春船百陪多  
廣陵銅器越溪羅  
三郎官爵如泥土  
爭唱弘農得寶歌

琵琶絃急袞梁州  
羯鼓聲高舞臂鞦  
破費八姨三百萬  
大唐天子要纏頭



絕句

柴桑春晚思依依屋角鳴鳩雨欲飛昨日已收寒食火  
吹花風起却添衣

蘇轍五首

雨花巖

巖花不可攀翔藥久未墮忽墜幽人前知子觀空坐

白龍潭

白龍晝飲潭修尾掛石壁幽人欲下看雨電晴相射

會子瞻兄宿道遥堂二絕

道遥堂後千尋木長送中宵風雨聲  
悞喜對牀尋舊約不知漂泊在彭城

秋來東閣涼如水客去山公醉似泥  
困臥北窗呼不醒風吹松竹雨淒淒

南窗


京城三日雪雪盡泥方深閉門謝還往  
不聞車馬音西齋書帙亂南窗朝日升  
展轉守牀榻欲起復不能開戶

失瓊玉滿堦松竹陰故人遠方來疑我何苦辛踈拙自

當爾有酒聊共斟

此其少年時所作也東坡好書之以  
為人間當有數百本蓋閑淡簡遠得

味外之  
味云



宋藝圃集卷四